

**Lana Bećiragić:**

Upoznala sam ga petog juna, a za kampanju sam počela raditi trećeg juna. Dala sam ostavku na svom poslu 20 dana prije nego sam ga upoznala i moji prijatelji su me pitali da li bih voljela da radim za njegovu kampanju. Rekla sam da bih ga mogla upoznati a onda odlučiti u vezi toga. Kad sam dala ostavku na svom poslu, zapravo sam planirala da neko vrijeme putujem i malo se odmorim. Međutim, puno sam putovala za vrijeme kampanje tako da sam taj dio zapravo ispunila. Kad sam ga upoznala, jednostavno smo kliknuli. Vjerujem da smo osjetili istu energiju i razmišljali o istim ciljevima. Ne znam, bilo je neke hemije među nama, posebnih emocija. Mislim da smo uradili dobar posao zajedno, i evo nas.

**Clark Curtis:**

Šta u vezi njegove poruke te privuklo da kažeš da želiš raditi za njega i vidjeti može li se nešto učiniti?

**Lana Bećiragić:**

On mi je rekao da ima samo jedan uvjet da se bude dio njegove kampanje, a to je da je njegova kampanja morala da bude u potpunosti fer, pozitivna i čista kampanja te da, kad se probudimo 8. oktobra naša savjest mora da bude čista i da moramo znati da smo uradili dobru stvar. Mislila sam da, ako je spreman da spasi mene kao dio kampanje, onda je on dobar čovjek, i to mora da je vrijedno rada i ulaganja energije u sve to. To je bio razlog da kažem da je on taj pravi.

**Clark Curtis:**

Šta iz njegove poruke je učinilo da osjetiš da je to čovjek koji može donijeti promjene zemlji?

**Lana Bećiragić:**

Ja sam glasala danas, i dok sam glasala za njega, nazvala sam ga i rekla sam mu hvala, a on je pitao za šta. Zahvalila sam mu zato što sam po prvi put u svom životu glasala za njega, tj. za nekog, a ne protiv nekog, i bila sam vrlo sretna. Istu stvar sam osjetila kad sam ga upoznala: da je on potpuno normalan i da nije želio da postane predsjednik samo zato da bi bio predsjednik.

On je želio da postane predsjednik jer je to jedina pozicija s koje će ljudi moći čuti ono što on ima da kaže, tako da bi mogao ostvariti neke ciljeve koje zapravo ne bi mogao ostvariti ni na jednoj drugoj poziciji. On bi mogao promijeniti način razmišljanja ljudi. Svidio mi se jer je nešto što je potpuno novo ovdje i što ima tu posebnu energiju koja motiviše ljude i daje im hrabrost da promijene svijet. Jer, u našoj kampanji mi smo doslovno mogli raditi sve što smo željeli. Ako bismo dobili neku ideju, on nas je ohrabrio da to uradimo, i bilo je savršeno da nismo morali da tražimo dopuštenje za sve, nego smo mogli da budemo slobodni. Mogli smo uraditi sve što smo smatrali da je ispravno, uraditi bilo šta i napraviti bilo kakvu promjenu. Ne znam koji je pravi razlog što sam ja postala dio toga. Nikad nisam rekla da sam ja iskra, znate, jer mnogi ljudi kažu da su iskre. Neko ga je u šali na Facebooku nazvao *Sparkman* (prim. prev. spark – iskra), i mi smo napravili šalu od toga, ali ja nikad nisam rekla da sam iskra, jer iskra je nešto masivno, nešto s čim se ljudi mogu identifikovati. Ja ne volim da se identifikujem ni sa čim u životu, općenito. Dakle, ja nisam iskra, ali sam neko ko zaista cijeni ideje koje on ima. Bila je to odluka jasnog uma i jako razumna, u potpunosti donesena mojim mozgom i ne toliko nošena emocijama, iako sam mu rekla da je ova kampanja pobudila emocije u meni. Jer, kao što znate ja sam prilično tvrda po pitanju emocija, ali ova kampanja je nekako učinila da se osjetim živom. Nešto se jednostavno probudilo u meni, i evo me.

**Clark Curtis:**

Ti znaš da sam ja razgovarao s njim i da je cijela ideja bila da i ako ne pobijedi, on ipak želi da započne pokret koji će ići naprijed, i kreirati stranku i podršku, tako da stranka bude još jača za četiri godine. Namjeravaš li biti dio toga na neki način?

**Lana Bećiragić:**

Definitivno. Prije dva dana sam ga zamolila da mi napiše pismo preporuke, i on me pitao zašto mi preporuka treba. Rekla sam da možda treba da potražim neki drugi posao, ili tako nešto, da mi jednostavno treba pismo preporuke. On mi je rekao da će napisati pismo preporuke za mene ako ću studirati, ali ako želim raditi za nekog drugog, onda nije baš siguran da li će potpisati takav dokument. Rekao je da sam nešto zaista rijetko na ovom svijetu i da želi da radim stvari s njim i

ostanem uz njega. Tako da, volim raditi s njim i bit ću dio toga, zasigurno. Ko zna? Prije nekoliko mjeseci pročitala sam nešto: da ljudi koji kažu da mogu promijeniti svijet su ti koji to i mogu, tako nešto. A ja vjerujem da je on dovoljno lud da promijeni svijet, a ja sigurno mogu biti i luđa od njega.

**Clark Curtis:**

Kakvo je cijelo to iskustvo bilo za tebe? Mislim, ti si u suštini počela sa ovim od samih začetaka, i vidjela si kako ovo raste do ove faze i gdje bi moglo dalje ići.

**Lana Bećiragić:**

Mislim da ljudi prepoznaju da je ova kampanja bila drugačija i da je Mirsad potpuno drugačiji kandidat, da on ne mora da ima ovo u svom životu odnosno da mu ovo nije potrebno za bilo kakav uspjeh i da on ne radi stvari zbog novca ili nekog interesa nego samo zbog ljudi u Bosni. Jednom kad smo bili sami, pitala sam ga koja je stvarna svrha njegovog dolaska ovdje. Mislim, nisi valjda dovoljno lud da ovo uradiš zbog ne znam ni ja čega. I on me upitao zar mu zaista ne vjerujem. Rekla sam da to nije jer mu ne vjerujem nego da mora da ima nešto veće od promjene načina razmišljanja. Ja sam mislila da to nije dovoljno, ali na kraju vidim da ipak jest. Njemu zapravo ne treba ništa od ove kampanje i ljudi su to prepoznali. Pa, 50.000 ljudi je to prepoznalo, ali to je ipak dobar početak onog što bi moglo postati masivan pokret. Imamo stranku Platforma za progres, tako da možemo ostvariti progres sa tim brojem ljudi koji su glasali za njega odnosno za nas. Mislim da je on probudio mlade i probudio mnoge koji ranije nisu glasali, i sada ljudi zaista imaju nekog za koga mogu glasati, a ne samo da glasaju protiv nekog.

**Clark Curtis:**

Ima li zabrinutosti ako on odluči da ne bude kandidat za četiri godine nego da samo daje podršku? Mogli biste izgubiti ljude jer oni do kraja ne shvataju ideju da su oni značajan dio ovoga čak i ako on nije vođa, da tako kažemo.

**Lana Bećiragić:**

Ljudi u Bosni vole lidere. To bi mogao biti problem. Ali isto tako, on nam je rekao da ne želi da se ljudi identifikuju s njim nego sa idejom. On ima ideje i nije važno ko će biti vođa. Ideja je bitna. Međutim, kad su u pitanju ljudi u Bosni, mislim da bi oni više cijenili ako bi Mirsad ponovo bio kandidat i ako bi bio dio ovoga ponovo, jer on je već postao poznat javnosti i mislim da su ljudi u Bosni prepoznali lidera u njemu. Pokušat ću nekako da ga uvjerim da se ponovo kandiduje a ne da priprema nekog drugog za kandidaturu. Nisam sigurna hoće li to uspjeti, ali ja ću dati sve od sebe da to postignem. Jer, on je vođa, on je dobar i ljudi ga vole. Nije ga briga ko ste vi i šta radite, nego zbog koje svrhe vi radite stvari ovdje. Dakle, ako je to dobro za Bosnu, njemu će to biti dobro. Dakle, mislim da za četiri godine on mora ponovo biti kandidat, jer ljudi se nikad ne bi identifikovali sa mnom. Ja studiram marketing i znam da ljudi moraju da imaju neke emocije prema nekome, da moraju da se identifikuju sa tom osobom, i tek onda na samom kraju dolazi lojalnost. Mislim da su ljudi zaista emotivno povezani s njim i da se mogu identifikovati sa ovom idejom. Neki od njih su lojalni toj ideji i ja ne bih promijenila kandidata na sljedećim izborima da sam na njegovom mjestu. Ali nisam, pa će biti teško.